

2 PITA

Pita Mij Kidek Ak Tikak

¹ Yad Saymon Pita, Jisas Klays bi wog giñeb ne midil, bi takaw nop dad ameb ak midebin. Miñil yad mij anib ak ñu kil tikebin. Tikil, nibi Klays nop gos linepim okok nibop ñebin. Jisas Klays, ne God chin ak midil, bi kasin gep chin ak mideb. Ne yipid gil gitep gup. Chin nop kiles gil gos linopun tek, nibi abe nop kiles gil gos linepim. ² Nibi God ayip Biawl chin Jisas ayip kilop gos nigtep gil midebim. Ak nim kili nibop yimug niñid gitep gek, kimigel midtep ginimib.

God ne ke chinop aglil dup

³ Jisas ne kiles ne ak dil, tap tep ne ak chinop ñak. Ñek, pel midtep gil God anigup tek ak niñid, kidek ginigun tek lup. Chin God nop nopun, anib ak tek aniginigun tek lup. Ne chinop suk agak. Agek, yib awl ne dup ak sek, ne gitep yibil gup ak sek, chin abe dinigabun. ⁴ God chinop tap okok midupsek ñub ak, tap awl yibil tap telep yibil mideb. Tap anib okok, nibop anib okok ñinigayn agil bilal aglak. Nigim. Chin binib lum awl midobun okok, mubwak gos nab ayan nedil ak kidek ginigun agil gos nopun. Gos nigon, chinop gi timel yibil gup. God pen tap tep ne anib okok nibop ñak. Ñek, nibi tap timel yibil ak nibop gi timel gup ak, tap anib okok dideg linimib tek lup. Tap anib okok dideg lil,

God ne koñim mîdep tek yenigabim, ne gitep gup tek ginigabim.

⁵ Pen nîbi anigil mîdtep ginig, tap anib okok adek anib ak nep gi yenimib. Klays nop gos liniginimib. Klays nop gos linîjid, abe gitep yibil ginimib. Gitep yibil gil, abe God nop gos nigtep ginimib. ⁶ God nop gos nigtep gil, abe takaw sayn tep agil gos nigtep ginimib. Takaw sayn tep agil gos nigtep gil, abe miñel awl apek jak kiles gil midil miñel okok dinimib. Miñel awl apek jak kiles gil midil miñel okok dil, abe God gup tek ak niñid kidek ginimib.

⁷ God gup tek ak niñid kidek gil, abe mam ay okok ayip penpen mapen lilig dinimib. Mam ay okok ayip penpen mapen lilig dil, abe binib okok kilop mapen yibil linimib. ⁸ Biawl chin Jisas Klays nop gos nigtep gipim. Anib ak gitep ginimib apin ak, adek anib ak nep genigabim, nop gos nigtep gipim anib ak yokip tek ma yenigab. Wog ak gem am tep yibil ginigab. ⁹ Binib takaw miñil apin ak kili kidek ma gipal okok, kili tap pal okok mîdeb ak ma niñigel tek lek, kili widin koy tek mîdebal. Binib anib okok tek, God tap si tap timel geligipal ak tig walig giyokil gach kilop wik yokak ak pen, kili sawl gil, God kilop gak anib ak gos nig nep ma mîdebal.

¹⁰ Mam ay sikop, God ne nîbi binib yad yenimib agil, nibop suk agil aglak. Anib ak tek nîbi kiles timel yibil gil, binib ne yibil okok yenimib. Apin anib ak genigabim, ma apyap pakinigabim. Mel yibil. ¹¹ Ne pen kanib yikil owim agek, nîbi Klays binib dil kilop kod yenigab ak amnigabim. Man

1:5 1 Pi 3.7, 2 Pi 3.18 **1:6** Gal 5.22-23 **1:7** Gal 6.10, 1 Te 5.15, 1 Jo 4.21 **1:8** Jon 15.2, Tat 3.14 **1:9** Hib 9.14, 1 Jo 1.7, 2.9-11
1:10 2 Pi 3.17, 1 Jo 3.19

anib ak Klays kod mideb ak, pel pelnep yenigab. Jisas Klays ne Biawl chin ak midil, ne bi kasin gep chin ak abe mideb.

¹² Anib ak yad nibop tap anib okok tepayan agil, agilig nep yenigayn. Yad nepin, nibi anib ak nigjuwil, takaw ninid yibil ak dil jak kiles gil midil midtep gipim. ¹³⁻¹⁴ Biawl chin Jisas Klays pen yip agnek nepin, wulep mideb yad mubwak yad ak keliginigebin. Anib ak mubwak yad ak midebin won ak, nibop tepayan agnen, tap anib okok gos ak tepayan niginimib. Yad aniginigayn ak, tep mideb. ¹⁵ Yad kumnigayn nin ak, nibi takaw agebin anib okok sawl ma ginimib, nigilig yenimib agil gos nepin. Anib ak tek kiles timel yibil gil nibop pel agni tep gebin. Anigen, kidek abe anib okok sawl ma gil, gos nigilig yenigabim.

God milek awl ne ak Klays nop pakek nopun

¹⁶ Chin Biawl chin Jisas Klays ne kiles sek adikid ownigab takaw ak nibop agon nepek. Pen takaw anib ak, anoj yokip okok bi gos kili ak nep apal ak, ma aginok. Ned God milek tep ne sek kiles awl ne sek Klays nop lek, wak ne ke yibil lak ak, widin chin ke ninid nibop aginok.* ¹⁷ Nin anib ak, Bapi God ne nop yib awl nil, milek tep ne ak nop lak. Lek, God ne milek sek man ne alan midakni, Klays nop agak, Ni mapen yad yibil nim awl agak. Nop nigen yip tep yibil gup agak. ¹⁸ Chin Klays ayip amil dum

1:12 Plp 3.1, 1 Pi 5.12, 2 Pi 3.1, 3.17, 1 Jo 2.21, Jud 5 **1:13-14**
Jon 21.18-19, 2 Ko 5.1, 2 Ti 4.6, 2 Pi 3.1 **1:16** 1 Ko 1.17, 1 Jo 1.1

* **1:16** Kesim anib awl, Jisas wak nop ak ke lak kesim ak. Matyu 17.1-13 ayip, Mak 9.2-13 ayip, Luk 9.28-36 ayip niginimin. **1:17**
Mat 3.17 **1:17** Mat 17.1-5, Mak 9.2-7, Luk 9.28-35

God yek ak yonokniŋ, takaw God man ne alaŋ niŋ anib agek niŋinok.

¹⁹ Anib ak tek bi God gos ñek agñeb takaw agilak okok, takaw pisnep dep okok nep agilak ak nim, kiles gil gos niŋinok. Nibi abe takaw kili ak nigtep gil pisnep denimib, tep mideb. Takaw agilak anib ak, sup maynab ayaŋ dagilel, milek yomub ak tek gup. Milek anib ak, nig dad amil, kidek Klays milek ne ak gos nibi nab ayaŋ tikjakinigab. Tikjakek nim, gap pogilin man tikakniŋ aplan jakup tek ak ginigab. ²⁰⁻²¹ Nigim. Bi God gos ñek agñeb okok, kili buk Baybol takaw ak mij tikiŋig, bi olap gos ne nigak akaŋ gos kili ke nigilak tek tikil ma agilak. Mel. God Kawnan ne ak kilop kod midilig gos ñakniŋ, anib ak nep God takaw ne nep tikil agilak. Anib ak tek takaw nokom olap nigtep ginimib. Bi God gos ñek agñeb okok, God kilop gos ñek takaw ne ak nep tikilak. Gos kili ke niŋid tig asikil ma tikilak.

2

Bi oginap kili God takaw agñobun agil yepis apal

¹ Pen bilel, bi oginap kili bi God gos ñek agñeb midobun agilak ak pen, yepis agilak okok, kili Yislel binib nab okok yeligipal. Miñil anib ak nep, bi oginap kili nibop takaw tep agñobun agil yepis aginigabal okok, kili nab nibi okok ap yenigabal. Midil, gos kili nig we gil, takaw yepis yepis aginigabal. Takaw aginigabal anib ak, Klays

1:19 Sng 119.105, Jon 5.35, Lep 2.28 **1:20-21** Apo 1.16, 3.18, Lom 12.6, 2 Ti 3.16, 1 Pi 1.11 **2:1** Mat 24.11, Apo 20.30, 1 Ko 6.20, Epe 1.7, 1 Ti 4.1, 2 Ti 3.1-5, 1 Pi 1.18, Jud 4

nop gos linepim ak gi timel ginimunj tek linigab. Bi anib okok, kili Biawl ne kilop tawil tig asik dup ak, ne Biawl mel agil agju midilig, kud ninigabal. Kili aniginigabal won ak, God kilop gek, kasek yul awl yibil dil kul ginigabal. ² Pen Klays binib ne kunay yibil takaw kilop ak dil, tap si tap timel okok monmon yibil ginigabal. Anigel, binib oginap takaw ninid yibil kidek gipun pal ak agjunigabal. ³ Bi kili takaw tep agnobun agil yepis aginigabal anib okok, tap chin ke kunay yibil dun agil gos niniginigabal. Mani tap nibi ak dinigun agil, nibop takaw yepis yepis kunay yibil aginigabal. Aniginigabal ak pen, bilel God ne kilop tig asik bilokinigayn agil, nin anib ak aglak mideb. Aglil midil, mid dad amil, nin aglak anib ak apek, God kilop tig asik bilokek yul awl yibil dil kul ginigabal. Pen bi anib okok, kili God chinop tig asik ma bilokinigab agil, gos anib ak ma niniginigel. Mel yibil.

⁴ Nib nepim, bilel bilel God ne ensel tap si tap timel gilak okok kilop ma keligak. Nag kiles timel ak kilop lil, mab ke yineb migan ak diyokek, kaw migan kisilim owup ayan anib ak yelak. Nag lek midil, God kilop tig asik bilokinigab nin ak kod midebal. ⁵ Pen binib bilel God nop kud nil kidek ma gilak okok, kilop abe ma keligak. Kilop gi timel gek kul gilak. God gek man awl ak pakil nig tan aplanek, midupsek nig nibil kum dilak. Nowa pen, ne bi yipid gil gitep gil takaw agnak ak yek. God Nowa ayip, binib ne anep kugul ak ayip, kilop

2:3 Lom 16.18, 2 Ko 12.17-18, 1 Te 2.5, 1 Ti 6.5, Tat 1.11, 2 Pi 1.16

2:4 Luk 8.31, Jon 8.44, 1 Jo 3.8, Jud 6, Lep 20.2-3 **2:5** Stt 6.1-7.24, 8.18, Hib 11.7, 1 Pi 3.20, 2 Pi 3.6

nep kod yek midtep gilak. ⁶ Pen binib bilel taun Sodom ayip taun Gomola ayip yelak okok, God kilop bilokil nibi binib kumeb agak. Anib ak taun Sodom ayip taun Gomola ayip, pisnep yin sibok amnak, tun kab ak nep yek. Anigek, binib God nop kud ñil kidek ma ginigun agil nepal okok, kili Sodom Gomola gak tek chinop abe ginigab agil, gos nigtep ginigel. ⁷ Pen bilel Sodom Gomola anigak ñin ak, God ne bi yipid gep Lot ak nop dil kod yek, tap olap nop ginimunj tek ma lak. Lot ne binib titimel anib okok, tap si tap timel okok monmon yibil geligipal ak ninid, chibol nop timel gak. ⁸ Yaw, bi yipid gep anib ak, ne nab kili okok midil, minek minek timel gilak ak ayip takaw timel agilak ak ayip nigak. Gos ne nab ayan abe yipid gup ak nim, kili monmon gilig God agak ak pisnep keligilak ak nigek, chibol nop timel yibil gak. ⁹ Anib ak tek nep chin nopun, binib God nop gos ninid kidek gipal okok, minel oginap kilop apek, ne kilop dil kod yek, tap olap kilop ginimunj tek ma lup. Pen ne binib tap si tap timel nep gipal okok kilop gek, minel dilig yul dinigabal. Minel dilig yul daknin, midil mid dad amil, binib kilop tig asik bilokep ñin ak ownigab. ¹⁰ Pen binib oginap kili yul awl timel yibil dinigabal. Binib anib okok, kili pelpel bin si bi si gi dad amil keke timel yibil gil, nab kili ak ke tap gach gi timel gipal. Anigil gi timel gil, Biawl takaw ak keligil, ak takaw yokip tek lup agil gos nepal.

Kili chin yib awl yibil midobun agil, gos kili ke kidek gel jel ma gak. Anigil midil, ensel kiles timel

2:6 Stt 19.24, Nam 26.10, Jud 7 **2:7** Stt 19.1-16 **2:9** Sng 34.17-19, 1 Ko 10.13, Jud 6 **2:10** Jud 4-10, 16

okok kilop monmon agjupal. ¹¹ Ensel oginap sek pen anib ak tek ma gipal. Kili abe kiles midebal ak pen, Biawl ne nig mideb ak, kili binib anib okok kilop ma agjupal. Mel yibil. ¹² Binib anib okok pen, kili tap titay dil mideb agil ma nepal okok monmon agjupal. Gos timud kili ak ke pal ak pal ak midil, chen ladek chag ladek okok gos kili midebal tek midebal. Midebal anib ak, sab chag gon lel, dek paklel kubal tek ak kilop ginigab. God kilop gi timel yibil ginigab. ¹³ Kili tap timel gup okok nep gel amub, bi oginap kilop pen abe gi timel ginigabal. Chin subnab tap awl nibilig, nig kiles nibilig monmon miñmiñ ginigun agil nepal. Kili nib ayip apnan gil tap jimñil nibil, gach sek midil nibop gel, yib nibop gi timel gipal. Tap yepis anib okok gilig miñmiñ gipal. ¹⁴ Kili bin si dun agil, widin lil nep ajipal. Tap si tap timel pel gipun ak keliginigun agil gos ma nepal. Binib Klays nop gos kiles ma nepal okok, kilop nebneb gi dad kid kili ak amel, tap si tap timel gipal. Tap chin ke kunay yibil dun agil, gos kili nab ayan anep lup. God kilop yul awl yibil ak ñinigab. ¹⁵ Kili kanib yipid gil adek ak keligil, am sawl sek lipal. Balam, Beyol ñine, ne kanib timel adek ak kidek gak tek, kili abe gipal. Yad gi timel gen yip mani tap okok ñel din agil, gos anib ak kidek gak. Pen bi anib okok kili anigipal. ¹⁶ Pen Balam ne anigil gi timel gek, chag donki ne ak nop ag gak. Chag donki okok, takaw yibil ma apal ak pen, chag donki ne ak Balam nop bi apal tek ag gak. Ag gek, bi God gos ñek agñeb Balam ak,

2:11 Jud 9 **2:12** Jud 10 **2:13** Lom 13.13, 1 Ko 11.20-21, Plp 3.19, Jud 12 **2:15** Jud 11, Lep 2.14 **2:15** Nam 22.4-35

ne gi timel gil sawl linig gek anib ak keligak.

¹⁷ Bi anib okok, kili ñig kilam jup ak milep gup tek midebal. Pen man pakinig gek, yigen awl apil lig yokek ma pakup tek midebal. Anigil midel, God tep kili kisilim owup migan olap gilek, kili amil anib migan ayan yenigabal. ¹⁸ Kili ke suk agilig takaw yokip agilig, yib kili ke dad aplanibal. Binib kilop nebneb gi dad kid kili ak amel, kili bin si bi si gi dad amil keke timel yibil gipal. Bi anib okok kili anigel, binib oginap miñil nep binib tap si tap timel gipal okok kilop keligipal okok, kilop lipig dad amek tepayan tap si tap timel gipal. ¹⁹ Pen kili anib apal, Chinop kidek gem, nag lup ak keligil konjim amil, gos chin ke kidek gun agil ak nep ginigabim apal. Anib apal ak pen, kili ke pel gi timel gipal ak kilop pen gi timel gek, bi yokip wog giñeb tek midebal. Chin nopun, bi olap ne keligek tap oginap nop kodek, bi anib ak ne tap anib okok bi wog giñeb tek mideb. ²⁰ Niñid apun, binib oginap Biawl chin Jisas Klays, ne bi kasin gep chin mideb ak, kili nop gos nigtep gipal. Nigtep gel, kilop gek, tap lum awl gach gi timel gup ak piskid abal. Kili tap timel gup anib ak piskid amil, midtep gipal ak pen, tepayan gel amek, kilop di nag lil gi timel yibil ginigab. Ned mid timel gilak ak pen, tap gach anib ak kilop dil tepayan nag lek, pelpel mid timel yibil ginigabal. ²¹ Kili binib suntep midep kanib ak ma nepilap ak, tep gipikop. Pen kanib anib ak niñid, God takaw suntep ne ak dil, kidek keligipal. Anigipal anib ak, miñil midtep ma

2:17 Jud 12-13 **2:18** Apo 2.40, 2 Pi 1.4, 2.20, Jud 16 **2:19** Jon 8.34, Lom 6.16, 1 Pi 2.16 **2:20** Mat 12.45, Luk 11.26, Hib 6.4, 2 Pi 1.2-4 **2:21** Luk 12.47-48, Jon 9.41

yibil gipal. ²² Kilop anigup ak, takaw wulep olap, takaw niñid yibil mideb nepal ak agak, Chen okok yakil amil, adikid apil tap yakipal ak ñibal agak. Pen takaw olap abe anib agak, Chag okok ñig pakil, adikid amil tepayan wuleb kolkol gipal agak.

3

Niñid agup, Biawl ak ne adikid ownigab

¹ Binib mapen yad okok, nibop mij olap ned tik yokil, miñil olap tikebin. Nibop tepayan agñen, tap anib okok gos ak tepayan niñid, gos tep yibil ak nigilig yenigabim agil, ak tep mideb mij omiñal anib ak tikipin. ² Bi God gos ñek agñeb okok takaw kili bilel agñilak ak niñid, gos anib ak nigilig yenimib agil gos nepin. Pen Biawl ak, ne bi kasin gep chin mideb ak, takaw kiles ne ak abe niñid, gos anib ak nigilig yenimib agil gos nepin. Takaw anib ak, bi Jisas takaw nop dad ameb okok kili nibop agñilak.

³ Pen takaw nokom olap ned nigtep ginimib. Ñin kidek ak ownigab ñin ak, bi agjuwep okok midil, gos kili ke nab ayan nepal tek kidek gil, agjuwil aginigabal, ⁴ Bi ownigayn agil aglak ak, ownigab migan akal nib aginigabal? Based yes kili bilel okok midil kumilak ñin ak, gi dad amil miñil owup, lum awl ak alwol gilak ñin ak yek tek nep mideb aginigabal. ⁵ Bi anib okok, kili nigtep gipal ak pen, ñinen keligipal. Bilel bilel God agek, wisip adekab alañ lum awl ayan apjakak. Ne agek, wisip alañ lil,

2:22 Snd 26.11 **3:1** 2 Pi 1.13 **3:2** Jud 17 **3:3** 1 Ti 4.1, 2 Ti 3.1, 2 Pi 2.10, Jud 18 **3:4** Ais 5.19, Jer 17.15, Ese 12.22, 12.27, Mat 24.48, Luk 12.45 **3:5** Stt 1.6-9, Sng 33.6, Kol 1.17, Hib 11.3

ñig ayañ ak kuskus gıl, lum ak nab ayañ lil gak. ⁶ Kidek agek, ñig tan aplanıl lum awl yu gek, pisnep timel gak. ⁷ Miñıl pen ne anigıl agek, wisip adekab alañ lum awl ayañ kod mideb. Kod yek, kidek God gek mab miñılañ lum sek adekab sek pisnep dagilinıgab. Ñin anıb ak, God binıb kilop tig asik bilokıl, binıb God nop kud ñıl kidek ma gilak okok, kilop gi timel gek kul ginıgab.

⁸ Pen binıb mapen yad okok, tap nokom anıb ak sawl ma ginımıb. Biawl ak ne anigıl gos nigup. Ñin nokom olap, ak sub kuñay yibil anep 1,000 tek lup, sub kuñay yibil anep, ak ñin nokom olap tek lup. ⁹ Bi oğınap kili apal, Biawl ak ne takaw ne aglak ak, saynsayn geb apal. Pen mel ak. Biawl ak ne takaw ne aglak ak saynsayn ma geb. Ne pen binıb olap pisnep timel gıl kul ginımuñ agıl ma nigup. Binıb midupsek kili tap si tap timel gıpal ak taynen anıgıpun agıl kelıginıgel agıl gos nigup. Anıb ak yıp yil ownımıb agıl, nibop yilik ma niñid kod mideb.

Wisip adekab alañ lum awl ayañ timel gıl kul ginıgab

¹⁰ Pen Biawl ne ownıgab ñin ak, bi tap si dep okok nig midel ma opal tek ak ownıgab. Ñin anıb ak, wisip adekab alañ gu awl agıl pisnep kul ginıgab. Lum awl tap titay mideb okok midupsek, yin gıl ñig bad lil, kul ginıgab. Anıb ak lum awl sek tap gilak okok sek, midupsek ma yenıgab. ¹¹ Anıb okok midupsek yin ginıgab, anıb ak tek

3:6 Stt 7.11, 7.21, 2 Pi 2.5 **3:7** Mat 25.41, 2 Te 1.8, 2 Pi 3.10 **3:8** Sng 90.4 **3:9** Ais 30.18, Hab 2.3, Lom 2.4, 1 Ti 2.4, Hib 10.37, 1 Pi 3.20 **3:10** Mat 24.29, 24.35, 24.43, Mak 13.31, Luk 12.39, 1 Te 5.2, Hib 1.11, Lep 16.15, 20.11

nibi gitep ginimib akan monmon ginimib? Anigil ginimib. Yipid gil gitep gil, God gup tek ak ninid kidek ginimib. ¹² Nibi anigil gi dad amil, God binib kilop tig asik bilokinigab nin ak kod yenimib. Nin anib ak kasek ownimuj agil, wog kiles timel gil kod yenimib. Nin anib ak, wisip adekab alaj yin gil, timel gil kul ginigab. Pen lum awl tap titay mideb okok midupsek, yin gil nig bad linigab. ¹³ God pen aglil agak, Wisip adekab alaj sek lum awl sek ke kideyil nib linigayn agak. Agil, aglak anib ak kod midobun. Nab anib ak, tap yipid gil gitep gep ak nep yenigab.

Chin nigtep gil midil, Biawl ak nop kod yonigun

¹⁴ Anib ak tek binib mapen yad okok, tap anib okok kidek ownigab ak gos ninid, Biawl ak nop kod yenimib. Nibi kiles timel yibil gil, binib suntep ne takaw ma mideb okok midil, tap timel olap ma midil gach sek ma yenimib. Pen abe kiles timel yibil gil, Biawl ak ayip kimigel midtep ginimib. ¹⁵ Biawl ak ne binib kilop tig asik dinigayn agil, chinop yilik ma ninid kod mideb. Anib ak gos nigilig yenimib. Pen Biawl ak ne mam tep chin Pol nop gos tep nek, ne abe takaw nokom anib ak tek nibop mij tikak. ¹⁶ Mij ne tikup okok midupsek, tap anib okok nep agup. Ninid apun, takaw oginap ne tikup ak, takaw koslam nigep tek agup. Anigil agek, binib gos sikol sikol ninid, Klays nop gos kiles ma nepal okok, kili takaw anib ak tig adakil,

3:12 Ais 34.4, Mai 1.4, 1 Ko 1.7, Tat 2.13, 2 Pi 3.10 **3:13** Ais 65.17, 66.22, Lep 21.1, 21.27 **3:14** 1 Ko 15.58, Plp 1.10, 1 Te 3.13 **3:15** Lom 2.4, 1 Pi 3.20, 2 Pi 3.9 **3:16** Lom 10.3, 1 Ko 15.51, 1 Te 4.15

monmon agñibal. Pen Pol takaw ne tikup ak nep anib ma gipal, God takaw kunjay bi oginap tikilak ak abe gipal. Anigel, God kilop gek, yul awl yibil dil kul ginigabal.

¹⁷ Binib mapen yad okok, titay kidek ginigab ak nepim, anib ak nigtep ginimib. Mel ak, binib titimel gil yepis agil monmon gipal okok, kili gipal adek anib ak kidek gil apyap pakinimib tek lup. Nibi pen, Klays nop gos kiles gil linijid, jak kiles gil midebim. Anib ak anigil yonigun agil, nigtep ginimib. ¹⁸ Jisas Klays, ne Biawl chin ak midil, bi kasin gep chin ak mideb. Ne nibop pel yimug ninjid gitap gakanin, nop nepim. Nibop yimug ninjid gitap gup anib ak, nibop gek jak kiles gil yenimib. Nop nigtep gipim ak, nibi kiles gil gem amek, nop nigtep yibil ginimib. Pen miñil nop yib awl ñinigun, pel pelnep abe ñilig yonigun. Yaw.

3:17 Mak 13.5, 13.23, 13.33, 1 Ko 10.12, Epe 4.14, 2 Pi 1.10-12

3:18 Epe 4.15, 2 Ti 4.18, 1 Pi 2.2, Jud 25, Lep 1.6

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 22 Feb 2024 from source files dated 29 Jan 2022

24d09cce-9a93-523a-afa5-7b091c264cee